

# Xroon tsikjin ndo Pablo xruen'en ndo ndo Tito

## Ndo Pablo nichje'e ndo ndo Tito

**1** <sup>1</sup>Jan'an, Pablo, nta'a xrée ndo Dio ko ndo Jesucristo kuinche'ena ndo ixi sintakuan'an kain sen kuinche'e ndo Dio ko kaxon ixi xrochuxin sen nge'e chuntiana ko me'e ti chijni nduaxin, <sup>2</sup>ko xrochon'en sen ti tsechón sen kain nchakon. Ndo Dio, ndo ncheya'i, tsindachro ndo nduaxin jaña tson'en ti xrako'a nunte xasintajni. <sup>3</sup>Ko nchakon tsindachro ndo Dio ixi jaña tson'en, je'e ndo juinchenoína ndo chijnie ndo ixi ikaxin sen juakoína sen. Ko ndo Dio, ndo nchemé'e jéina, kuetuan'an ndo ixi sinta'a xrée ndo ko tsjako chijnie ndo. <sup>4</sup>\*Kjin'an xroon ji'i, Tito. Jan'an tikuan xranchi chjan'na ixi kayuina chuntiana ndo Jesús. Juasie Ndotáina Dio ko ndo Jesucristo, ndo nchemé'e jéina, je'e ndo sintanchaoan ndo ko tsikonó'a'a ndo ko xrotjáa ndo juaxruxin.

## Ixra sinche'e ndo Tito tjajna Creta

<sup>5</sup>Nchakon kuintu'a nunte jii ngusine ndachaon<sup>a</sup> ndatin'in Creta ixi xroketuen'én sen jii nti'a xranchi sinche'e sen ko xrojuinchejexian ixra titjáña ko xrondachrua ngisen tsetuan'an ngujngu ni'ngo jii tjajna xranchi kuetuan'an jan'an. <sup>6</sup>\*Xrokonda ixi ngisen jitao'en ni'ngo jian sinche'e sen ixi jaña xro'an ngisen tsjankata'a na sen ijie, ko xrochóna sen naakua janchri'e sen, ko chjen'en sen xrokonda tsitikaon xjan Ncháina Jesucristo, ko jaña xro'an chujni tsjankata'a xjan ijie ko jian tsitikaon xjan. <sup>7</sup>Jaña sen jitao'en ni'ngo, sen me'e tikinixin'en sen xrondachro sen xranchi tson'en xrée ndo Dio, xrokonda naa ngisen jian tsake'e ixi jaña tsjankata'i na sen ijie. Ko sinchejié'a sen aséen sen, ko taka'i xrochjée sen juaña. Ko xrokuan'i sen, ko tseto'a sen ngajin chujni ko

<sup>a</sup> 1:5 *ndachaon* mar

1:4: 2Co. 8:23; Gá. 2:3; 2Ti. 4:10. 1:6: 1Ti. 3:2-7.

sincheya'i sen ixi jaña xrotsé sen tomi tjúá'i. <sup>8</sup>Ko jian tsayé'e sen xrojan ngisen tsiji ndo'a sen; xrokonda sinche'e sen ti jian; jian xroxaxaon sen ko ndako sinche'e sen ngajin ngixe'i chujni. Ko nchijí aséen sen tsake'e sen ngajin ndo Dio ko ixi nchijí aséen sen sinche'e sen xrée nchée sen. <sup>9</sup>Ko kaxon xrokonda tsintue'a sen chijni jian kuayé'e sen ixi jaña tsjako'e sen ikaxin sen kichuu sen chijni jian, ko kaxon jaña sinchendá sen aséen ni ndachro je'a nduaxin nge'e tjakona.

<sup>10</sup>Ixi jii itsjé ni titikaon'a, ni me'e ste ngakjen'en ni judío, ni nichja xranchi naa ni ninta ko ncheye'e na ikaxin chujni. <sup>11</sup>Ni me'e xrokonda tsije'eni ro'a na ixi nchetjáñajin na kain sen ste naa nchia ixi je'o tjako na nge'e nduaxin'a ko je'a jian, ixi jaña tsjacha na kueya tomi.

<sup>12</sup>Naa xi tjajnée sen, tjajna Creta, tsindachro xa: "Kain chujni tjajnána tsango ncheya na ko tsango jie'e na ko tsango ine na ko tsango se'e na." <sup>13</sup>Ti tsindachro xa nduaxin me'e. Méxin, Tito, soji nichje'é sen kichuuna ixi jian xrochuntia sen ndo Dio. <sup>14</sup>Nichje'é sen ixi tsien'a sen kain nge'e teki ni judío, ko tsitikaon'a sen nge'e tetuan'an ni ningakon'en chijnie ndo Dio, chijni nduaxin.

<sup>15</sup>Ni jian xraxaon, kain nge'e nche'e na tjúá kaxon. Ko ngisen ndako'a xraxaon, xro'an nge'e

jian xraxaon na ko kain nge'e xraxaon na, tjúá'i. <sup>16</sup>Ndachro na ixi chúxin na ndo Dio, ko ti nche'e na, me'e tjakoxinna ixi je'a nduaxin ti nichja na. Je'e na tsango ña'i na ko titikaon'a na, méxin jua'i nche'e na naa nge'e jian.

### Tsjako ndo Tito chijni jian

**2** <sup>1</sup>Kain nge'e tsjakoa xrokonda jian sinchekuen'en sen xranchi jitaxin chijnie ndo Dio. <sup>2</sup>Nchekuen'én sen tachrii ixi xrokuan'i sen, jian sinche'e sen ko jian xronichja sen ngajin kain chujni. Xroxaxaon sen jian, ko jian xrochuntia sen, ko xrotjue'e sen sen kichuu sen ko takali xrochjée sen juaño. <sup>3</sup>Ko kaxon jaña janachri jian sinche'e jan ko xronichja'i jan juancheya ko xrokuan'i jan. Jian tsjakoxin jan ixi titikaon jan Ncháina, <sup>4</sup>ixi jaña tsjako'e jan nchrichajan xranchi xrotjue'e nchra ndoxi'e nchra ko xranchi xrotjue'e nchra chjen'en nchra, <sup>5</sup>ko jian xroxaxaon nchra, ko tjúá aséen nchra tayakon'en nchra ndo'a nchra ko tsingijna nchra kain chujni, ko tsitikaon nchra ndoxi'e nchra ixi jaña xro'an ngijni xronichjang'i'e chijnie ndo Dio titika'onna.

<sup>6</sup>Kaxon nchexraxaon sen chajan ixi jian sinche'e chán ko jian xroxaxaon chán. <sup>7</sup>Ja'a jian nche'e kain nge'e ixi jaña tsjakoxian ngajin kain sen ixi ja'a jian. Ko nchakon tsjakoa,

chjente'a ko tjakoa ti nduaxin.

<sup>8</sup>Nichja nge'e nduaxin ixi xro'an chujni tsjankata'a nā ijie, ko jaña tsosue'e ni ningakon'en chijni, ko xro'an nge'e ti ña'i xrondachro nā kondee jaina.

<sup>9</sup>Tetuen'én ni nche'e ixrā ixi tsitikaon nā nchée nā ixi jian sinche'e nā ti kuetuen'en nā ko xronichjangl'a nā, <sup>10</sup>ko xrotsee'a nā nge'e je'a ne'e nā. Ko jaña kain nā tsikon nā ixi chijnie ndo Dio tsango chaxro chijni ko tajon ndo juachaxin tsechónni kain nchakon.

<sup>11</sup>Ixi ndo Dio juakoina ndo xranchi tjuaina ndo ixi je'e ndo sinchem'é'e ndo jíee kain chujni sínká. <sup>12</sup>Ti tjuaina ndo Dio nchekuaina ixi tsintu'ena kain ti ndako'a ko kain nge'e ña'i xraxaonna. Ko jian tsake'ena nunte xasintajni ko ndako xroxaxaonna ko tsitikaonna ndo Dio. <sup>13</sup>Kaxon tjakoina ndo xranchi xrochon'enna nchakon tsij ndo Dio na'ina, ndo Jesucristo, ndo chóna kain juachaxin ko tajon ndo juachaxin tsechónna kain nchakon. <sup>b</sup> <sup>14</sup>\*Je'e ndo kuen'en ndo ixi jaina ixi tjaun ndo tsajon ndo juachaxin tsechónna kain nchakon ixi kuantsje ndo kain ti ndako'a chondana, ko tjume'e tsayé'ena ndo xranchi naa chujnie ndo ko juaxruxin sintu'una kain nge'e tjaun ndo.

<sup>15</sup>Tito, jil'i tjako'é sen ko nchexraxaoan sen ko tetuen'én sen ixi juachaxien ndo Dio. Tintue'a ixi xrojan ngisen xronichjangl'a ko tsjanao sen ixi nge'e tjakoa.

**Nge'e sinche'e sen  
titikaon ndo Cristo**

**3** <sup>1</sup>Nchexraxaoan sen tsitikaon sen ni tituan'an, ko tuinxin sinche'e sen kain ixrā jian. <sup>2</sup>Ko xronichja'i sen ninaa nge'e ti ndako'a ixi sen kichuu sen, ko taka'i tsoñao sen, ko xrotjue'e sen sen kichuu sen ixi jaña tsjakoxin sen nge'e jian chóna sen ngaya aséen sen, ko jian xronichje'e sen kain chujni.

<sup>3</sup>Ixi jaina kaxon sa'ó juinche'ena xranchi ni ninta, ko baktikaon'ana ndo Dio. Ndako'a juinche'ena, bakojuuna juaxruxin ixi kain nge'e ña'i banche'ena ko bakochjuyeina, ko baningakoina nā, ko jaina kaxon baningakon'ena chujni. <sup>4</sup>Tjume'e ndo Dio, ndo tantsjengí'e kain ti ndako'a juinche'ena, juakoina ndo ixi jian ndo ko tjue'e ndo kain chujni. <sup>5</sup>Je'e ndo juinchem'é'e ndo ti ndako'a kuachondana, je'a ixi jaina xrojan nge'e jian juinche'ena. Na'i, ixi je'e ndo bikonóajna ndo ko juinchem'é'e ndo ti ndako'a juinche'ena ko juinchetjúá ndo aséeina. Jaña

<sup>b</sup> 2:13 *tsechónna kain nchakon* vida eterna  
2:14: 1Pe. 2:9.

jongíexinna íjngo ixi Espíritue ndo ko jai natjúá stechónna. <sup>6</sup> Ixi ndo Jesucristo, ndo juinchemé'e ti ndako'a juinche'ena, méxin ndo Dio kuajon ndo Espíritue ndo. <sup>7</sup> Ko juasie ndo, juinchemé'e ndo jéina ko jaña tsayé'ena juachaxin tsechónna kain nchakon.

<sup>8</sup> Nduaxin chijni ji'i, ko tja'on ixi tsjako'a kain ji'i ixi kain sen titikaon ndo Dio sinche'e sen kain nge'e jian. Kain ji'i jian ko tingijna kain chujni. <sup>9</sup> Ko ndache sen xronichja'i sen xrojan chijni ninta, ko tien'a chijni teki sen ti juinche'e sen tachrí'ina, ko tintue'a sintaketo'xin sen ti ley kuajon ndo Moisés. Ti tjakaxin kichuu sen tjinte'a ko xro'an juachaxin chónna.

<sup>10</sup> Síá kondeexin xrojan ngisen tjaun xrojan sen ni'ngo tsinkaxinton sen, nichje'é sen kondeexin me'e naa o yuu vez ixi ndako sinche'e sen ko síá tsienxin'a sen, ndache sen satsjixin sen ni'ngo, <sup>11</sup> ixi ja'a ó no'a ixi sen jaña nche'e ndako'a

xraxaon sen ko ti nche'e sen jaña ícha nchekangi sen ijje chónna sen.

#### Nge'e kuetuan'an ndo Pablo

<sup>12</sup> \*Nchakon xroxruan'an ndo Artemas ko ndo Tíquico tsiji sen. Chjakon'an tuinxin tsji'ia tsitsjenana tjajna Nicópolis ixi nti'a tsake'é tsatsingaja nchakon ikin. <sup>13</sup> \*Ja'a jian tingijna ndo Zenas, ndo abogadoe chujni, ko ndo Apolos, ko chje'é sen ti xrokonde'e sen nchakon satsji sen ixi xro'an nge'e tsitjáñe'e sen. <sup>14</sup> Ko sen kichuuna xrokonda tsitja sen sinche'e sen nge'e jian ko tsingijna sen sen kichuu sen nchakon tsake'e na juachjaon, jaña tsjakoxin sen ixi tjintee nge'e nche'e sen.

#### Juexin nichja ndo Pablo

<sup>15</sup> Kain sen riki'an nti'i xruan'an sen juajna. Ko ja'a tájuan juajna ngajin kain sen chuntia Ncháina nti'a, kain sen tsango tjuajna. Ndo Dio sintanchaonnta ndo kainnta. Jaña tson'en.